



**JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁL**

*Komunikadu Imprensa  
13 Maiu 2014*

**Maioria Membru Parlamentu Nasionál Propoin Altera kriasaun ba Estatutu Rejiaun Oe-cusse Ambeno iha Espesialidade**

Maioria membru Parlamentu Nasionál tantu husi Bloku Koligasaun Maioria Parlamentár nomós opozisaun Fretilin propoin tenki altera proposta Lei Nú 12/III (2<sup>a</sup>) kona-ba kriasaun Estatutu Rejiaun Oe-cusse Ambeno iha diskusaun espesialidade. Proposta alterasaun ne'e hato'o tanbá konsidera artigu lubuk ida husi proposta lei ne'e inkonstitusionál. Pozisaun membru parlamentár sira ne'e hato'o durante diskusaun no aprovasaun iha plenária jeneralidade, iha loron 12 Maiu 2014. Aprovasaun iha generalidade ne'e pasa ho votus a favór 56 no absteinsaun 1.

Membru parlamentu sira kestiona priviléjiu ne'ebé sei fó ba Prezidente de Autoridade ZEESM tuir artigu 14<sup>o</sup> alinea 3, ne'ebé define katak tenki hanesan ho titular husi órgaun soberanu sira, afinal ZEEMS iha hala'o nia funsaun submete ba Primeíru Ministru.

Pozisaun membrus Parlamentár nian ne'e reforsa ho relatóriu pareser husi Komisaun A ba asuntu Konstituisaun, Justisa, Administrasaun Públiku no Anti-Korrupsaun, ne'ebé propoin elimina artigu 36<sup>o</sup> kona-ba revizaun ba proposta lei ne'ebé la fó kompetensia ba Parlamentu Nasionál atu apresenta proposta alterasaun hodi fó de'it ba governu no Rejiaun Administrativa Espesial Oe-cusse Ambeno.

“JSMP enkoraza Parlamentu Nasionál atu ezerse sira nia kompetensia atu asegura katak política hotu-hotu ne'ebe produz tenke refléta no konsistente ho regra konstitusionál sira ne'ebé eziste. Se ida ne'e la akontese, ita nia estadu bele hatur iha risku nia laran,” dehan Diretór JSMP Luis de Oliveira Sampaio.

JSMP hanoin katak realmente prezensa lei ida ne'e importante duni tanbá sei fó oportunidade ba povu iha rejiaun refere no povu Timor Leste iha jerál. Maske nune'e, tuir JSMP katak esforsu no política ba dezvoltamentu nasionál hotu-hotu tenke realístiku no tuir prinsipiu komún sira ne'ebé konsagra iha ita nia konstituisaun.

Objetivu jerál husi lei ne'e rasik atu regula estatutu administrativu rejiaun espesial Oe-cusse Ambeno ho ninia rejime jurídiku, prinsipius, modelu autonomia no órgaun administrativu inklui hatuur mós illa Ataúro nu'udar komplementa ba Rejiaun Administrativa Espesial Oe-cusse Ambeno iha área turismu. Lei ne'e rasik sei sai hanesan baze fundamentu ba kriasaun ZEESM (Zona Espesial ba Ekonomia Sosial ba Merkadu) ne'ebé sei kria iha 2015.

Atu hetan infórmasaun kle'an liután favór kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)

[info@jsmp.minihub.org](mailto:info@jsmp.minihub.org)

Telefone: 3323883|77295795

Website: [www.jsmp.tl](http://www.jsmp.tl)

Facebook: [www.facebook.com/timorleste.jsmp](https://www.facebook.com/timorleste.jsmp)

Twitter: @JSMPTl